

Yang Isinulat Ni SANTIAGO

Patkaw Ang Pasanag Tung Kumpurming Magbasa

Yang may sulat taa ti Santiago ang yay sasang nagmaepet-epet tung sam pundaan yang mga tumatalig duun tung siudad yang Jerusalem (Mga Binuat-buatan 15:13-21; Galacia 2:9). Tanya sasang putul ni Ginuung Jesus (Mateo 13:55; Juan 7:3-5). Yang mga tumatalig ang sinulatan nang kada sam pundaan, pulus mga masigkanasyun nang mga Judio. Ugaring namagliliitan da tanira duun tung Jerusalem natetenged masyadung pagpandeeg-deeg tung nira atiing ti Esteban pinagbatu rang inimatay (Mga Binuat-buatan 8:1, 4; 11:19). Purisu nagkarawasaki-wasak da tung dumaramang banwa (1:1). Purisu kumus pagirilalaan dang lagi tanira ni Santiago, may ubligasyun nang magpaiwan-iwan tung nira maskin alawid da.

Yang sinikad ni Santiagong nagsulat ay ugud mapasanagan na ta maayen yang mga kaputulan nang atia. Ay nagaskean na ang durung mga bagay ang puiding pagsangkelan yang pagtaraligen nira tung ni Ginuung Jesus. Ay katulad ka tung yaten simanyan, pirmi kang nagapasaran tanira ta mga kaliwagan may mga tuksu ang muya yay makanayan ta ipanluway yang mga isip nira ang asta indi ra ipalusu nira yang kalelyagan yang Dios. Kung indi, magpaguyud da ilem tung sistimang pangkaliwutan. Purisu gustu ni Santiago, paktelen na yang mga isip nirang magpadayun tung pagtaraligen nira, kag yadwa pa, paamanen na ka dayun ang indi ra enged magbalik tung dating mga ubra-ubra nira.

Ang para madeep ta yang palaksu yang isip ni Santiagong nagsulat, maayen pang pabilugan ta ra kanay yang durug kaimpurtanting intindien tang tanan ang mga tumatalig.

1. Kaministiran ang magagwantaita tung mga kaliwagan ang nagapasaran ta kipurki asanita ra magluang mainagwantaen ig magtegasanita ra ka tung pagtaraligen ta, ig asanita ra ka masalapay tung pinalanu yang Dios para tung yaten (1:2-4). Durug tinlu yang mabtangan yang sasang tumatalig ang pagagwanta tung mga kaliwagan ang asta masalapayan na. Ay kipurki pakdulan da yang Dios yang sasang klasi ta pagpangabuing pinangakuan na tung kumpurming tinu pay pagmaal tung anya (1:12). Tung pagaragwantaen ta, simpri may kaministiran ta ang yang mga isip ta mas magwayang ang para maskeitang magtimbang-timbang tung mga isip ta kung unu pay uyun tung kalelyagan yang Dios may yang belag. Anday dumang magpaeyang, ya ra yang Ampuan ta kung yay

ingalukun ta tunganya ang anday dua-dua tung mga isip ta (1:5-8). Ig kidispuis pa, duruang klasi ta isip ang mawayang. May kawayayangen ta isip ang pangkaliwutan ka iliem ig may kawayayangen ta isip ang nagipaeyang yang Dios. Kung unu pang mga ubra-ubraay ang nagipalua yang duruang klasing atia, ipinasanag ni Santiago tung 3:13-18.

2. Maskin aranekita tung pagterelengen ta duma, indiita magsinti, kipurki tung pagterelengen yang Dios itay abwat (1:9). Ita ra nganining ay pinilik nang magpalgud tung paggaraemen na tung baklung kaliwutan (2:5). Piru kung natetenged tung mga manggaranen, maliwag yang panampetan nira tung uri (1:10-11; 5:1-6).
3. Durug kaimpertanti ang magmaskeitang magsuspindi tung mga nganga ta (1:26) ay kipurki kung indi ta suspindien, durug kadistrusadu yang apiktar na tung mga kaarumanan ta. Inalimbawa ni Santiago tung apuy may tung dalit (3:1-12). Dapat ang indiita ra enged magriliwakan (4:11-12) ig indi ta ra ka panuntan ta sumpa yang pangaku ta tung mga aruman ta. Dapat ang yang ibitala ta purus matuud ang anday laket nang bukli.
4. Duru kag kaimpertanti ang yang pagtaraligen yang sasang tau tung ni Jesu-Cristo may kanunut na kang mga matitinlung pagurubraen. Ay kung anda, yang paganingen nang pagtaraligen na, andang pisan ay kuinta na ay ya ra aganingay ni Santiagong pagtaraligen ang patay (2:14-26).
5. Yang sasa kang dapat ang amligan ta ta mupia ang indi enged manrusaw yang gegma ta tung Dios. Yang sasang maktel ang magparusaw kung ipagamen ta yang mga isip ta tung sistimang pangkaliwutan. Kung yay pagamenan ta, yang kaalimbawaan ta maning pa tung sasang baway ang paglimbung tung kasawan. Ay kalaum ta ang asanita mas maging kuntintu kay tung pagipakdul tung yaten yang Ampuan tang Dios. Purisu kung magpagamenita tung sistimang pangkaliwutan, anday duma, asanita ra magluang kasuay yang Dios. Ay maning pa tung mangimunda tung yaten ang yang gegma tang bugus pa rin tunganya ipinakalaw ta ra tung sistimang pangkaliwutan (4:1-10; 4:13-17).
6. Durug kaimpertanti ang ita maderep tung pagarampuen ta kapin da enged para tung mga putul tang paglaru. Kaminstiran ang yang pagarampuen ta nunut da ka ta pagtalig ta tung Dios ang yang nagaingaluk ta siguradung ipakdul na. Yadwa pa, kaminstiran ka ang yang mga buat-buat ta pulus tung magkatama ugud dakulung bagay yang pakawutun yang pagarampuen ta ang katulad ka tung ni Elias atiing tukaw (5:13-18).

Yang Intrada Yang Sulat (1:1)

1 ¹Yang may sulat taa ya ra yuung ti Santiago ang sasang pagpaturuwulun tung Dios durua ni Gnuung Jesu-Cristo. Tukaw-tukaw tung tanan, pagpакumustaw ra tung numyung mga masigkanasyunung mga Judio ang kumpurming mga tumatalig ka tung ni Jesu-Cristo ang nagkarawasak-wasak da tung duma-rumang banwa^a.

**Natetenged Tung Tamang Pagpabetang Nira
Tung Mga Kaliwagan (1:2-8)**

2-3Mga putulu tung ni Ginuu ta, nagaskean ta ra ang kung masukdaan da nganing yang pagtaraligen ta, basta indiita ra ilem magpaluntug, asanita ra magluang mainagwantaen. Purisu kung mapasarananita ra nganing ta sari-saring mga kaliwagan, ipabtang ta ra ilem ang sasang ikasadya ta ta duru. ⁴Ugaring kaminstiran ang padanayan ta yang pagaragwantaen tang atia ang asta dumangat da ka enged tung katuyuan nang ita magtegasan da tung pagtaraligen ta pati yang intirung pagkatau ta masalapay ra tung pinalanu yang Dios ang anday pagkakulang na. ⁵Piru kung tinu pa tung yaten ay midyu nagadiputan da ta isip na natetenged ka man tung kaliwagan ang nagapasaran na, kaminstiran ang magingaluk da tung Dios ang paabwaten na yang isip na. Kipurki tanya durug kasalamang pagpакdul ta diwaldi tung kumpurming magingaluk tunganya ang indi na kag pakulainen yang taung magpakdulan na. ⁶Ugaring ilem tung pagingaluk ta tung Dios, kaminstiran ang anday pagdua-dua yang mga isip ta, kung indi, dapat ang may pagtalig ta ang yang nagaingaluk ta tunganya ipapakdul na tung yaten. Dapat ang may pagtalig tang maning tia ay kipurki yang kaalimbawaan yang taung pagdua-dua yang isip na, maning pa tung sasang lakuun ang mageyepen ta palet ang basing ay pa ilem eklay na. ⁷Yadwa pa yang taung maning tia dapat ang indi ra maglaum ang tanya pakdulan pa yang Dios yang pagaaingaluk na. ⁸Ay ya pa agari, sulut-beteng yang isip na ig waldang-waldang da yang tanan ang ubra-ubra na.

**Yang Aranek Tung Pagteleng Ta Tau Ya Pay Abwat
Tung Pagteleng Yang Dios (1:9-11)**

⁹ Yang sasang tumatalig ang pagatelengan ta aranek yang mga tau, yang dapat ang ikasadya na ta mupia ang tanya abwat tung pagterelengen yang Dios. ¹⁰Pati yang sasang manggaranen, kung maaranek da yang pagkabetang na, dapat kang ikasadya na yang

^a **1:1** Ikumpalar tung sinambit tung Mga Binuat-buatan 8:1, 4 may 11:19.

pagkaaranek na^b. Ay kipurki yang manggad magtataklib da ka ilem ang katulad ka tung sasang talay.¹¹ Simpri kung abwat da nganing yang kaldaw ang makinit da, nagaleey ra yang ilamunun. Pati talay na, nagataktak da ka ig asan da ka nga diadu yang katinlu na. Yang pisan yang kalimbawaan yang sasang manggaren. Mintras pagsikad ang madulangan pa yang manggad na, inali ra ilem ang maplekan ta tanan ang nagikadengg na.

**Natetenged Tung Duruang Magluluaan Yang Pagsukda
Yang Dios Tung Sasang Tau (1:12-15)**

¹² Ibaliku ra kanay tung pagsurukdaen yang Dios tung yaten. Teed mi tiag katinlu yang mabtangan yang sasang tumatalig ang paggwanta tung mga kaliwagan! Ay kipurki kung masalapayan na ra nganing tia, pakdulan da ta maning pa tung sasang primyu ang ya ra yang sang klasi ta pagpangabuing pinangakuan yang Dios tung kumpurming pagmaal tunganya. ¹³ Kung tinu pay nagapasaran ta kaliwagan ang asan ka nga bagasay na yang kaaway nang tuksu, dapat ang indi ra magintra sulili tung Dios ang yaunu ay pagtagam ta tuksu tunganya. Kipurki tanya indi kayanan ta tuksung magbuat ta malain ig indi enged magtuksu tung yaten ang para magbuatita rin ta malain. ¹⁴ Kung indi, nagatuksu ilem yang sasang tau kung bekngen da ngani yang sadiling kalelyagan na. ¹⁵ Pagkatapus, kung ya ray pakdulan na ta rugal, yang kaalimbawaan na maning pa tung sasang baway ang pamuu ra ang yang pakawutun na mangana ra. Ya ray kamtangan yang taung pagpaktul ta lugar tung kalelyagan na ang anday dumang pakawutun na, magpakasalak da ka enged. Pagkatapus kung maanaran na rang maanaran yang pagpaketul nang atia, ya ray pagmasilitan na ang yang pakawutun na, asan da nga pablag tung Dios.

**Yang Nagipakdul Yang Dios Tung Mga Tauan
Na Pulus Tung Ikaayen Nira (1:16-19)**

¹⁶ Mga putulung nagamaalu ta duru, indiamu magpadaya tung isip ming baliskad ang yang Dios yay pagtagam ta tuksu tung numyu^c. ¹⁷ Kipurki yang tanan ang matitinlu ang anday kakulangan nang magkakawut tung yaten, luwus tung Dios manliit ang yay nagimu yang tanan ang pamagdekal duun tung langit. Yang pagdekal nira paguman-uman ay nagalingban.

^b 1:10 “dapat kang ikasadya na yang pagkaaranek na.” Yang ilinaktek ang atia, magkabagay ilem tung sasang tumatalig. Piru kung belagan tumatalig, maning taa yang tamang paglalakteren: “ikasadya na kaya tiang pagkaaranek na? Indi ra!” Kung unu pay pagtereleng ni Santiago tung mga manggaranen atii kanay, maayen ang ikumpalar ta tung isinulat na tung 2:6-7; 5:1-6. ^c 1:16 Katulad tung nasambit tung 1:13.

Piru yang Dios tanya, andang pisan ay kauman-umanan yang ugali na ang pulus tung ikaayen ta.¹⁸ Kipurki telengan mi. Natetenged ilem tung sadiling kalelyagan na, pinaeyanganita ra anya ta ipagpangabui tang baklu ekel tung kamatuuran ang pinananged ta. Ya ray binuat na ugud maning pa tung itay pinakatukaw ang inayeg na ang yay pagpailala ang may planu na kang imakluen na ka yang tanan ang inimu na^d.

**Nagapapagprusigir Na Tanira Ang Yang Bitala Yang Dios Belag Da
Ilem Ya Pamatay Nira Kung Indi Ya Tumanay Nira (1:19-25)**

¹⁹ Kapurisu mga putulung nagamaalu, naa wa yang dapat ang intindien mi. Sasa may sasa tung yaten, kaministiran ang yang paderepan ta ya ra yang pagparamatieng ta tung bitala yang Dios. Yang paluwayen ta, ya ra yang pagturuwal-tuwalan ta may yang kasilag ta.²⁰ Ay kipurki kung masilagita, indiita enged mapagtuman yang magkatama ang gustu ra rin yang Dios ang yay buaten ta.²¹ Purisu maskin unu pang malalawayay, ipamlek ta rang luwus. Asta yang maskin unu pang malainay ang naanaran tang tukaw, lipaten ta ra kang tanan. Pakdulan ta ta lugar yang bitala yang Dios ang nunut da ka ta pagparanek ta tung anyang magpatulduk ang para rumabung da ka enged yang kamatuuran ang ilinuak na tung mga isip ta. Ay ekel tung builu na tung mga isip ta, asanita ra nga libriay na tung pagpakasalak ta.

²² Ugaring belag da ilem ang yag pamatiay ta yang bitala na, kung indi, yang tumanay ta. Ay muya kung ya ra ilem agpamatiay ta, asanita ra nga dayaay yang sadiling mga painu-inu ta.²³ Kipurki kung tinu pay pamati ka ilem tung bitala yang Dios ang pagkatapus indi na ra ka tumanen, yang kaalimbawaan na, maning pa tung sasang taung panalamin ang ya rag dawalay na yang sadiling ityura na.²⁴ Maskin naita na ra, imbis ayusun na, diritsyu ra ilem ang magpanaw ay lipat dang pisan tung isip na kung unu pa rin ay dapat ang ayusun na.²⁵ Yang bitala yang Dios durug kabuilung mangimaklu tung mga isip ta. Yadwa pa, asanita ka nga luas tung pagpakirepen ta tung pagpakasalak ta ugud maeyanganita ra ka ta ipagtuman ta yang kumpurming ipatuman na tung yaten. Purisu kung tinu pay pagpasadsad da ta mupia tung bitala na ang pagkatapus ya ra kay padanayan na ang belagan ya ra ka ilem agpamatiay na ang pagkatapus diritsyu ra ilem ang malipatan na, kung indi, antimanung tumanen na ra yang nagipatuman yang Dios tung anya, asan da ta taung papagkasadyen da ta mupia yang Dios tung pagturumanen na.

Natetenged Tung Ustung Pagrintindien Tung Dios (1:26-27)

²⁶ Kapurisu kung papagbilugunu ra yang nagipaganingung atia, ya ra taa. Kung tinu pay paglaum ang tanya pagintindi ta ustu tung Dios

^d 1:18 Katulad tung sinambit tung Roma 8:20-21; Efeso 1:10; Colosas 1:20; 2 Pedro 3:13; Ipinagubligar 14:4; 21:1.

ang pagkatapus indi na rag suspindien yang nganga na, asan da nga dayaay yang sadiling isip na. Anda enged ang pisan ay kuinta na yang paganingen nang pagirintindien nang atia tung Dios. ²⁷Kung indi, yang ustung pagirintindien tung Dios ang magkatama tung pagterelengen na ang ita magpadagen-dagen tung mga ilu may tung mga balung mga baway tung mga kaliwagan nira. Yadwa pa ang ita mangaman ta mupia tung mga sadili ta ang indiita masaliran yang sistimang pangkaliwutan.

Natetenged Tung Pamilik Nira Tung Mga Masikatau Nira (2:1-13)

2 ¹Mga putulu, yang pagtaraligen tang naa tung ni Ginuu tang Jesu-Cristo, indi ta ra enged palaktan ta pagpiriliken ta tung mga masikatau ta sigun tung pagkabetang nira. Kipurki yang kadengegan ni Ginuu tang naang nagapanaligan ta asan da nga bilugay ta tung pagparanek na yang pagkabetang nang nagpakiunung tung mga taung aranek ta pagkabetang. ²Ay ipabetangu may sasang taung magpasakep tung saragpun ming mga tumatalig ang may titing nang bulawan ang yag susuksuk tung tulduk na ig durung pisan agkatinlu yang awel ang pagasuut na ang pagkatapus may sasang maliliwagen ang magpasakep ka ang yang awel na ketket da ta buling. ³Pagkatapus ya ray sapten mi ta mupia yang sam bilug ang durug tinlu yang bisti na ang ya ra aganingay ming “Tani, tania kumarung tung parada” ang pagkatapus yang maliliwagen ya ra aganingay ming “Asana ra ielem kemdeng tung binit u kung gustu mu, tania ra ielem ngarung tung daktal.” ⁴Ta, indi, asanamu rag pamilik tung mga masikatau mi? Belag bang maling pisan yang pitik ang pagagamit mi tung pagpabetang mi tung mga tau?

⁵Mga putulung nagamaalu, isipen mi ta maayen. Belag ba ang yang mga maliliwagen tung kaliwutan ang naa ya enged ay pinapgilik yang Dios ang maging manggaren tung pagtaraligen nira tung anya? Belag bang tanira kay pampaintraen na tung paggaraemen na tung kaliwutan ang baklu ang yay pinangakuan na tung kumpurming pagmaal tung anya? ⁶Pagkatapus yang numyung atia, yang mga maliliwagen ya rag lipi-lipiay ming pakaeyakay! Belag ba ang yang mga manggaranen yay pagpandeeg-deeg tung numyu kung kaisan? Belag bang kaisan tanira ka mismu ay paglagunut tung numyu duun tung katalungaan yang mga usgadu ang para idimandaamu ra nira? ⁷Belag bang tanira ka mismu, ang kung sambiten da nganing yang aran ni Ginuu tang Jesus, ya rag duminaray nira yang kadengegan na? Ang pagkatapus ya ra kay aran ang durug kamaal tung numyu ig ya kay sinabit mi atiing pagpailala mi ang nagpagaemamu ra tung anya!

⁸Muya manuwalamu ra ielem ang yang pagsarapeten ming atia tung mga manggaranen, ya kay pagturumanen mi yang sasang katuwulan ang dapat usuyun yang kumpurming pagpamangulu tung Dios ang

katulad ka tung napabtang tung kasulatan ang dapatita unu maggegma tung mga masikatau ta ang pariu ka unu tung paggegma ta tung sadili ta. Atia, kung mapruibaan mi ang talagang ya ka man ay nagipagsapet mi tung nira, maayen ka rin.⁹ Piru maning da tiang nagipaita ming pamilikamu tung mga masikatau mi, belag yamug pagtuman yang katuwulan ang atia, yamug pagpakasalak. Asanamu ra nga patemengay ang yamu talagang malinampasenamu ka man tung mga katuwulan yang Dios.¹⁰ Kipurki bilug yang mga katuwulan na. Kung tinu pay magtuman yang kadaklan ang mga katuwulan na ang pagkatapus may sam bilug ang nalampasan na, tung pagterelengen yang Dios katimbang nang pinaglampaan na rang luwus.¹¹ Ay kipurki yang Dios ang yay nagkalalangan ang indiita unu maglimbung tung kasawa ta, ya kay nagkalalangan ang indiita unu mangimatay tung masikatau ta. Taa numanyan ipabetangu, maskin indiita naglimbung tung kasawa ta piru napangimatayita ra ta tau, ig disir ita sasang malinampasen da tung mga katuwulan yang Dios.

Nagapapagbilug Na Yang Gustu Nang Ianing (2:12-13)

¹² Kapurisu maskin unu pay ianing ta, maskin unu pay buaten ta, eklan ta tung matinlung pasais ang katulad ka tung mga taung nagaintindi ang tung uri tanira insapuan da ka enged yang Dios natetenged tung tanan ang mga pagurubraen nira taa tung kaliwutan. Kipurki yang pitik ang usuyun nang manginsapu, ya ra yang kamtagan yang Matinlung Balita ang yay maning pa tung baklung katuwulan ang kung tumanen ta, asanita ra nga luas tung pagpakirepen ta tung pagpakasalak ta kag asanita ra ka ngaeyangay ta ipagtuman ta yang nagauyunan yang Dios^e.¹³ Aganingenamu ra yeen ta maning tia ay natetenged kung kawutun da nganing yang uras ang ipagpatuwal yang Dios tung yaten, indi na ra ildawan yang kumpurming indi naildaw tung mga masikatau na. Kung ildawan ta ra nganing yang duma, ya ray sasang ikasadya yang mga isip ta kipurki ya ray pruibang masanag ang ita matuud ang inildawanita ra ka man yang Dios ang tinapnay.

Yang Pagtaraligen Ang Anday Kanunut Nang Pagurubraen, Anday Kuinta Na (2:14-26)

¹⁴ Mga putulu, unu pay pulut na kung may sasang taung paganing ang tanya unu pagtalig ka tung ni Ginuung Jesus ang pagkatapus anday pruibang maita tung mga ubra-ubra na? Kung maning ka ilem tia yang kantidad yang pagtaraligen na, maimu wasung asan da natapnay yang Dios?¹⁵ Ipabetangu, may putul mi tung ni Ginuu tang sasang

^e 2:12 Ikumpalar ta tung sinambit na tung 1:25.

lalii ubin sasang baway ang durug kaalang-alang yang pagarawelen na ig pangaliwag da ta duru tung pamangan na tung kaldaw-kaldaw.

¹⁶ Pagkatapus may sam bilug asan tung numyung maganining tunganya, “Putulu, yawa ra agaliman ang pagpanaw. Tawangana ra yang Ampuan tang pakdulan ta masuut mung awel may mapangan mu.” Ang pagkatapus indi mi ka ilem pakdulan yang mga kaministiran na. Unu pa pay kuinta na tiang inaning ming atia tunganya? Sungaw ra ka ilem ay indi mi nagapanuntan ta pagurubraen. ¹⁷ Maning kang pisan tia yang pagtaraligen yang sasang tau ang pagkatapus indi na ra ka nagapanuntanta pagurubraen. Anday duma, yang pagtaraligen ang maning tia ya ra yang paganingen ang pagtaraligen ang patay.

¹⁸ Piru maya may magsulingaag tung yeen ang maganining, “Yang mga tau belagan pariu ta sistima. Yang sam bilug may pagtalig na, yang aruman na may pagurubraen nang matinlu.” Yang ituwalu tung taung pangatadlengan ta maning tia, “Abir ungkuy, ipaita mu ra kanay tung yeen yang pagtaraligen mung atiang indi mu nagapanuntanta pagurubraen. Ig ta yeen ka, ekel tung pagurubraenu, asan da ngaitaay mu yang pagtaraligenu tung ni Giniung Jesus ang talagang matuud.

¹⁹ Paganinga ka, ungkuy, ang yawa panangera ang sam bilug ilem yang Dios. Maayen ka. Piru kung asan ilem tegka yang pagtaraligen mu tung pagimpurmi mu ilem ang atia, anday kuinta na. Ay kipurki anda ka ilem ay nalandawan na tung pananged yang mga dimunyu. Maskin pamanaged ka ang sam bilug ilem yang Dios, piru duru kang pagpangerel nira ang maisip nira yang parusang anday katapus-tapusan ang nagielaat na tung nira. ²⁰ Aywa, ungkuy, anda pa ka enged ay naerem tung isip mu? Kaministiran pa ka enged ang papruibaanu ra tung nuyu ang andang pisan ay kuinta na yang paganingen yang sasang tau ang pagtaraligen na mintras anday pruibang nagaita tung pagurubraen na?

²¹ Pademdeman ta ra kanay ti Abraham ang kinaampu ta. Belag bang natetenged tung sasang binuat na duun da nga pruibaay ang tanya pagtalig ang matuud tung Dios? Bistung pisan atiing pagtuman na yang sasang itinuwul yang Dios tunganya ang yang ana nang ti Isaac dapat unung iinriga na tung anyang idasag^f. ²² Duun da ngaintindiay ta ang ekel tung pagtaraligen nang bugus tung Dios, duun da tanya ngaeyangay ta ipagtuman na yang itinuwul nang atii tunganya. Kag yadwa pa, tung pagtuman na duun da ka nagelet ang mas pa yang pagtaraligen na. ²³ Duun da ka ngaintindiay ta ang talagang tama ka man yang pagtaraligen na ang pariu ka tung sasang napabtang tung kasulatan ang tanya unu nagtalig da tung Dios ang magkereng tung pinangakuan na tunganya ig natetenged unu tung pagtalig nang atiing

^f 2:21 Genesis 22:1-19; Hebreo 11:17-19

bugus, duun da tanya ngaipabtangay yang Dios ang salu rang pisan tung pagterelengen na^g. Maskin tung dumang kasulatan, ti Abraham ya ra nganing aganingay ang tanya unu sasang ungkuy yang Dios ang durug tinlu^h.” ²⁴Kapurisu asan da ngaintindiay mi ang tung pagurubraen yang sasang tau, duun da ilem nga pruibaay ang tanya talagang pagtalig dang matuud tung ni Ginuung Jesus. Belagan ang maganing ang tama yang pagtaraligen na kung anday pruibang maita tung pagurubraen na.

²⁵Maning kang pisan tia yang palaksu na tung ni Rahab ang yay sasang baway atiing tukaw ang yang pangita na rin pagpagamit. Belag bang natetenged tung pagarasikasuen na tung mga tikitik, duun da nga pruibaay ang tanya talagang pagtalig dang matuud tung Dios? Bistung pisan yang pagtalig nang bugus atiing pagarasikasuen na tung mga masigkanasyun tang durua nga tiktikan may tung pagpainunuku na tung nira kung ay pang dalanay ang matinlung pagpalibrian nira. ²⁶Kapurisu ang para magbilug da yang gustuung ianing, ipapanawu ra ilem tung sasang pananglit. Katulad tung tinanguni ta sasang tau, kung anda ray linawa na, asan da ngaskeay ta ang patay ra. Ya rang pisan yang kaalimbawaan yang pagtaraligen yang sasang tau tung Dios ang pagkatapus anday kanunut nang pagurubraen nang matinlu. Yang pagtaraligen ang maning tia ya ra yang paganingen ang pagtaraligen ang patay.

Natetenged Tung Paggaramiten Ta Tung Dilak Ta (3:1-12)

3 ¹Mga putulu, maayen pang belaganamu dakeleng maging mga manigtulduk yang bitala yang Dios. Ay nagaskean mi ra ka ang yaming mga manigtulduk, kung insapuanami ra nganing ni Ginuu ta, mas maigpit yang panginsapu na tung yamen kay tung kadaklan ang pamamatil ilem tung yamen. ²Yang panginsapu nang atia ya ray dapat ang pangamanan tang tanan ay maskin tinu pa tung yaten, manigtulduk kag belag, malpes kang lagi ilem nganing ang mapagbuatita ta kamali. Kung tinu pay indi pagkamali tung pamitala na, asan da ta taung pagtegasan da tung pagtaraligen na. Maske rang magsuspindi tung intirung pagkatau na. ³Katulad da ilem asan tung sasang kabayu. Kung taknan ta ra nganing ta busal yang nganga na ang para masaayan ta, pati yang intirung tinanguni na maparumbu ta ra kung ay pay gustu tang paangayan na. ⁴Isipen mi ra ilem yang sasang gulita. Maskin dakulu, nagipalaksu nganing ta palet ang durug ketel, piru kayanan ta timun ang kagetey ka ilem ang bira-biraen ang kumpurming ay pay gustu yang timunil ang rumbuuen. ⁵Yang pisan yang kaalimbawaan yang dilak ta. Basin gesye ilem, piru dakulung bagay yang nagabuat na.

^g 2:23a Genesis 15:6; inulit ka ni Pablo tung Roma 4:3, 9, 22; Galacia 3:6 ^h 2:23b Duun da nga basaay mu tung Yadwang Cronica 20:7 may Isaias 41:8.

Telengan mi ra ilem yang apuy. Maskin alikasu ilem, piru kayanan nang palalawan yang intirung talun! ⁶Yang pisan yang kaalimbawaan yang dilak ta, distrustadu pa tung sasang apuy. May sari-saring mga malalain ang puiding bitalaen ta. Makamamansa tung intirung pagkatau ta ig makararangga ka tung pagnurunutan ta yang mga masikatau ta. Maning pa tung apuy ang nagakayawan ta mupia ni Satanas. ⁷Maayen pa yang dumang inimu yang Dios ang sari-saring klasi. Maskin unu pang klasiy, maging dayamdam man, maging lamlam man, maging iraw man, maging ian man tung teeb, yang tanan ang atia nagakayanan ta taung nagapaalam disti pa tung primiru ang asta ra simanyan. ⁸Piru yang dilak tang mga tau, andang pisan ay taung makayang mapaalaman kung tung sadili na ilem. Ay sasang malain ang indi enged makuntrul. Yang kaalimbawaan na punuk ang pisan ta dalit ang mapatayan ta tau. ⁹Ya kay nagagamit tang pagdayaw tung Ampuan tang Dios ang ya ray nagyaring Ama ta, ang pagkatapus ya pa kay gamiten tang magpamirisia tung sasang masikatau ta ang ya pa ka man ay inimu yang Dios ang ipinatulut-tulut tung sadili na mismu. ¹⁰Bilang sa nga ngangaan ilem yang panliitan yang pagdarayawen ta tung Dios may yang pagpamirisia ta tung mga aruman ta. Mga putulu, indi ka enged magkabagay tia. ¹¹Aywa wasu, may sungkuk ta wai ang pariung masabur may mapakit yang nagibeek na? ¹²Simpri, mga putulu, yang sasang ayung igus belagan natural nang mamurak ta olibo. Pati yang sasang balagen ang ubas belagan kang natural nang mamurak ta igus. Asta yang waing makasa-kasa belagan natural nang may wai kang masabur yang ipalua na. Intunsis dapat da rin ang belagan telyang-telyang yang magbitalaen ta, kung indi, purus limpiu.

Nagapagpasunaid Na Yang Duruang Klasing Pagkamataku (3:13–4:10)

¹³Tinu pang tauay asan tung numyung nagaintindian ming matakū ig maskeng magintindi? Kaminitiran ang ya ray papruibaan na tung mga pasais nang matitinlu ang maskin unu pay buaten na, ekлан na tung ugali nang mapinagparanek ig tung isip nang mawayang. ¹⁴Piru kung nagaeyanganamu ra ta ipagakig mi tung mga aruman ming mga manigtulduk ig pagkaralawanamu ra ta dengeg, maayen pang indiamu ra ilem magpabugal ang yamu matakū. Ay muya tung pagbukli ming atia asan da nga regmekay mi yang kamatuuran ang nagitulduk mi ra rin tung duma. ¹⁵Kipurki yang pagkamatakung maning tia, belagan paeyang yang Dios, kung indi, pangkaliutanen ka ilem ang ya kang lagi ay nagausuy yang mga tau ang yang mga kinaisipan nira indi pa nagaimaklu yang Espiritu Santo ig ya kay nagipaisip yang mga dimunyu tung nira. ¹⁶Talagang matuud tia ay kipurki kung ay pay sam pundaan ang may pagarakigakigan ig pagkaralawan ta dengeg, asan da ta

pagkagulu yang pagpurutulan nira pati yang maskin unu pang ubra-ubraay ang malain ya ray maita tung nira.¹⁷ Piru yang pagkamatakung nagipaeyang yang Dios tung yaten maning taa yang pasais na. Landaw tung tanan yang pagkabilug yang isip ta tung anya ang indi magtenakan. Asan da maniel yang kadaklan ang mga pasais tang nagauyunan nang maning taa. Asan da ta pagsikad ta ang ita pirming maguruyunan yang mga kaarumanan ta, asan da ka ta pagkaamumu tang belaganita ka maliwag ang pakigkesenan. Dispuis duruita kag kainildawen tung mga aruman ta ig duru kang mga ubra-ubrang mapalua ta ang ikaayen nira. Dispuis pa, kung natetenged tung pagsarapeten ta tung mga aruman ta, pantay-pantay ilem ang anday pinilikian ig alawid tung yaten yang pagpakaayen-ayen ilem.¹⁸ Pademdemean ta ra kanay yang sasang bitala ta mga mamaepet ang kung gustu ta unung magpalua yang magkatama tung pagterelengen yang Dios, tay puis yang maning pa tung dapat unung iluak ta ang ita unu pirming magsikad ang maguruyunanitang magpurutul tung matinlu. Ig yang pasais ta unung magluak ta maning tia, pirmi unu duun ipapanaway ta tung kinaisipan tang mauray.

4 ¹Piru ay pa wa? Yamug pagsuruay! Ta, tung numyung pagintindi, unu pa wasu ay natengeran yang pagsuruay-suayan ming atia? Belag ba natetenged ang dereegenamu pa yang sadiling kalelyagan mi ang yay gustu ming papsawan? ² Alimbawa, may sasang durung kalelyag ming maeklan, piru indi mi ilem maeklan. Ya ray nagatengeran na ang masilagamu ra ig may gustu mi rang mangimatay tung sasang masikatau mi ang para maeklan mi ra yang nagaisipan mi. Yang pagiriwegen ming atia tung mga bagay ang indi mi maeklan, asan da maniel yang pagsuruayan ming ereketen. Piru ya pa agarin maeklan mi atiang indi mi ka agingalukun tung Dios? ³ Ang pagkatapus, maskin ingalukan mi, indiamu kag pakdulan na ay nagaskean na ra kang lagi ang kung pakdulanamu ra anya, belag ya gamitay mi tung uyun tung kalelyagan na, kung indi, basta mapapsawamu ilem.

⁴ Abaa yamu, yang gegma mi tung Dios nagrusaw ra ang katulad ka tung sasang baway ang paglimbung da tung kasawa na. Aywa, indi mi pa ka enged nagaintindian ang kung magpagamenamu yang mga isip mi tung sistimang pangkaliutan, asanamu ra magluang kasuay yang Dios? Purisu kung tinu pay malelyag ang magpagamen yang isip na tung sistimang atia, asan da tanya magluang kasuay yang Dios. ⁵ Muya kalaum ming anday kapulutan na yang sasang napabtang tung kasulatan ang yang Dios unung nagimu tung yaten, kung may pagamenan tang asan da magrusaw yang gegma tang bugus pa rin tung anya, tanya maning pa tung mangimun da tung yaten. ⁶ Piru maskin pang maning tia, maktel ka enged yang tawang na tung yaten ang para maulikan da atiing gegma ta tung anyang magbugus si. Katulad da asan tung sasang pangaku na ang

yang tau unung tawangan na ya ra yang taung mapinagparanek. Piru yang tau unung mapinalandawen, ya ray kuntraen na ta mupia.

⁷Purisu magparanekamu ra tung Dios ang magpalamtuk yang pundu yang kinaisipan mi. Piru manguntielamu ra ka dayun ta mupia tung akles ni Satanas. Atia, palaksu ra kang paalawid tung numyu.

⁸Magpalengetamu ra tung Dios. Atia, magpalenget da ka tung numyu. Yamung makinasalanenan tabtawen mi ra yang mga ubra-ubra ming malalain tung pagterelengen na. Yamung pagtenakan yang isip mi, pabilugun mi rang tumanen yang kalelyagan yang Dios. ⁹Yang dapat ang meyang tung mga isip mi ya ra yang kapupungawen ming pagsugat natetenged tung mga kasalanen mi. Bilang yang pagtaralangkaken ming pagpakasadya asan dapat ang mapaklian da ta pagtarangiten ming pagseey. ¹⁰Purisu magparanekamu ra ka enged tung Dios ang magsuku. Atia, saptenamu ra ka anyang ipaabwat.

Nagapaamanan Na Tanira Ang Indi Enged Magliliwakan (4:11-12)

¹¹Mga putulu tung ni Ginuu ta, indiita enged magliliwakan. Ay kipurki kung tinu pay magliwak tung sasang putul na ang asan dang lagi nga pakusalakay na, katimbang nang asan da ka nga sawayay na yang mga katuwulan yang Dios ay asan da ka nga lamkuay nang maluway ang dumangat yang silut ang sinambit na. Purisu kung yang mga katuwulan yang Dios ya pay palangaasan tang lamkuuen ta maning tia, yang ilyag nang ianing, belaganita ra manigtuman yang mga katuwulan na, kung indi, asan da ipabtangay ta yang sadili ta ang sasang sintinsiadur! ¹²Sam bilug ilem yang nagsakdul yang mga katuwulan ang atia ig tanya ilem yang sintinsiadur. Ultimu ilem yang Dios yang may kagaeman ang magkalalangan natetenged tung sasang tau kung tanya sintinsiaan nang ipalibri u kung tanya sintinsiaan na tung kalainan. Aywa, unu pa pay pagpabetang ta tung mga sadili ta ang ita pay magtiwakaw tung anyang magsintinsia tung sasang masikatau ta?

Nagapaamanan Na Yang Pamagnigusyu Ang Masyadung Pamaniguru (4:13-17)

¹³Naa wa yang sasang dapat ang tandaan mi ang kumpurming maning taa yang nagipaganing na tung mga aruman na: “Numaan ang kaldaw ang naa ubin andamal, magdistinuami ra duun tung siudad. Duunami ra magtinir ang magnigusyu ta seled san takun. Talagang durung kuwartang maita yamen duun.” ¹⁴Abaa yang numyung atia, indi mi ilem ngani nagasiguru kung unu pay mabtangan mi andamal. Kipurki yang kalyunan ta, maning pa tung sasang ambun ang simanyan yag dawalay ta, ang pagkatapus, buay-wuay ilem ta gesye, magpuruwas da ilem. ¹⁵Ang indi, maning taa yang dapat ang ianing mi: “Kung kalelyagan

yang Dios ang paabwaten na pa yang mga kabui yamen, maning taa maning duun yang buaten yamen.”¹⁶ Piru ay pa wa? Maning da tiang paniguruamu rang laging pagpaambug tung mga sarili mi kung unu pay pakawutun yang pagkabetang mi! Yang tanan ang pagparaambugun ta maning tia durung pisan agkalain tung pagteleng yang Dios.¹⁷ Ig disir, kung tinu pay nagaske ra yang magkatama ang yay dapat ang buaten na ang pagkatapus indi na buaten, ya ray idata yang Dios tung anyang kasalanan na.

Yang Nagipagpadapat Na Tung Mga Manggaranen (5:1-6)

5 ¹Naa wa yang ipagprangkaw ra tung mga manggaranen. Maskin maayen yang betang mi numaan, kanugunamu ka enged agyapun. Bagay ang pisan tung numyu ang magintraamu ra ilem tarangiten ang nunut da ka ta pagirisyenken mi ang yang kaalimbawaan mi, maning pa tung kinawutanamu rang lagi ta mga pinitinsia. Ay kipurki siguradung dangatenamu ra ka enged yang sintinsia yang Dios. ²Bagay ang pisan tia tung numyu ay kipurki yang tanan ang mga kamanggaran mi magkaralubuk da ka ilem. Katulad da ilem asan tung mga awel ming atiang matitinlung klasing minumpuk da ilem, panganen da ka ilem ta mga dayapdap. ³Asta yang mga kuarta ming atiang nagatuwud ming nagatuwud ya ka, madiadu ra ka ilem. Ig yang pagkadiadu yang mga manggad ming atia ya ray magyaring sasang pruibang ipatemeng yang Dios tung numyung duruamug kaikaw. Yang kaalimbawaan yang nagitaluk ming atia maning pa tung sasang apuy ang ya ray ikadiadu mi tung uri. Purisu yang pagtaralukun mi ta manggad ang tagisip ming ya agikaayenay mi numanyan, tung uri ya ra ikalainay mi. ⁴Teed mi, yang suul yang mga manigayeg tung katriguan mi ang ya ray binuinan ming dinaya tung nira maning pa tung pagkkendalen da ta maknul. Tagisip ming anda ray panuwalan mi asan? Uay, yang mga riklamu yang mga manigayeg pinamati ra yang Dios ang makagagaem. ⁵Talagang pusawamu ra tung tanan ang kaayenan taa tung kaliwutan ang naa ang ya ra ka ilem ay nagapagustuan mi. Piru asan da nga pakbungay mi yang sasang baka ang nagipatambek da ang andang pisan ay laum-laum na kung unu pay nagielat tung anya. ⁶Basin yang mga taung anday kasalanan nira, ya ra agidimandaay mi tung usgadung nagapetelan ta kasalanan ang para ipaimatay mi. Ang pagkatapus yang mga taung atia, indi ka ilem makayang magdipindir yang mga sadili nirang magbatuk da rin tung numyu.

Nagapaktel Na Yang Mga Tumatalig Ang Indi Ka Mamagmataka Ta Pagpakbat Nira Tung Ipaglekat Ni Ginuung Jesus (5:7-8)

⁷Kapurisu ta numyung mga putulu tung ni Ginuu ta, maskin papinitinsiaanamu ta duma, magpaurayamu ra ilem ang magagwanta ang

asta kawutun da nganing yang uras ang ipaglekat ni Ginuu tang Jesus. Telengan mi ra ilem yang sasang tagluak ang pagpakbat tung kutitsya yang mga luak na ang yay nagalangkag na ta duru. Indi enged pagmataka ta pagelat tung uras ang atia. Tung primiru yang elatan na ya ra yang primirung bugsu yang kuran ang para mapagaradu ra. Asta yang kuran tung kauri-urian nagaelatan na kang maglaka-laka ang ya ray pagpailala ang nagaalenget-lenenget da yang tiligayeg.⁸ Purisu pati yamu ya ka, indiamu ka magnataka ta pagpakbat. Patenten mi yang mga isip mi ay kipurki yang uras ang ipaglekat ni Ginuu ta, nagaalenget dang nagaalenget.

Nagapaamaman Nang Indi Enged Magbarasul-wasulan (5:9)

⁹Mga putulu, kung mapanawanamu ra nganing ta mga kaliwagan ubin pinitinsia, indiamu ra enged magbarasul-wasulan ugud indiamu ka sintinsiaan yang Dios ang ya si kay ipagpakusalak na tung numyu. Yay dapat enged ang likayan mi ay kipurki yang ultimung manigsintinsia alenget dang maglekat.

Natetenged Tung Matinlung Mulidung Dapat Ang Pasuaran Nira

Natetenged Tung Pagaragwantaen Tung Mga Pinitinsia (5:10-11)

¹⁰Mga putulu, pademdeman mi yang mga manigpalatay yang bitala yang Dios atiing tukaw pang mga panimpu. Yang pagaragwantaen nira tung mga pinitinsiang pinasaran nira ya ray durug tinlung mulidung usuyun mi.

¹¹Talagang yay matinlung buaten mi ay kipurki nagaskean ta ra kang lagi ang yang kumpurming nagagwanta tung mga kaliwagan ang pinasaran na ya ra aganiningay tang sasang pinasadya enged yang Dios ang pinakaayen. Katulad da ilem duun tung ni maepet ang Job. Nagngel mi ra ka nganing natetenged tung pagaragwantaen na atiing tukaw pang panimpuⁱ ig nagaskean mi ra ka kung unu pay linuaan na tung kauri-urian da sigun tung planu yang Dios tung anya^j. Ay tanya durung pisan agkainildawen tung yaten ang mga tau.

Nagapaamanan Na Tanirang Indi Enged Manumpa (5:12)

¹²Simanyan, mga putulu, yang ianingung naa, ya enged ay tandaan mi. Kung unu pay ianing ta tung aruman tang tau, indi ta enged pagpanuntan ta panumpa. Indiita manumpa tung tanek may langit ubin tung unu pa man ang bagayay. Ang indi, kung ee, ay ee ra ilem. U kung indi man, ay indi ra ilem ugud indiita ra pakusalaken yang Dios.

Nagipagpasanag Na Kung Ya Pa Agaring Magtarawang-tawangan Tanira Ekel Tung Pagarampuan Nira (5:13-18)

¹³May asan tung numyu kaya ang nagapasaran ta kaliwagan? Kaministiran magampu tung Dios. May asan ka kaya ang masadya yang

ⁱ 5:11a Job 1:20-22; 2:9-10 ^j 5:11b Job 42:10-17

kinaisipan na? Magkabagay ang magdayaw tung Dios ang magkanta. ¹⁴May asan ka kaya ang paglaru? Kaministiran ang magpaguuy tung pamagmaepet-epet tung numyung sam pundaan ang mga tumatalig ang para tanya ipagampu nira tung Dios ang nunut da ka ta pagpiid nira ta lana ta olibo sigun ka man tung katengdanan ang ipinakdul ni Gnuung Jesus tung nira ang mamangerengan tunganya. ¹⁵Numanyan tung pagarampuen nira, kung may pagtalig nira ang yang nagaingaluk nira tung Dios ipakdul na tung nira, asan da magmaayan yang paglaru ay paktelen da yang Dios ang papagmaayenen. Dispuis kung alimbawa may mga kasalanan ang nagkarabuatan na ang muya ya ray natengeran yang masiit na, punasen da ka dayun yang Dios. ¹⁶Purisu magaraminanita rang lagi sasa may sasa yang anya-anyang kasalanan ang pagkatapus magarampuanita ra ka dayun ugud asanita ra nga pamaayenay yang Dios tung pagalaru ta. Kipurki yang pagarampuen yang sasang taung pagbuat yang magkatama tung pagterelengen na, dakulung bagay yang pakawutun na. ¹⁷Katulad da ilem asan tung ni Elias atiing tukaw. Maskin sasang tau ang pariu ka ilem tung yaten, pиру atiing pagampu na tung Dios ang tedek tung isip na ang indi na ra pakuranen yang banwa, indi ka man nagkuran-kuran tung seled tulung takun may tenga. ¹⁸Utru si, nagampu si ka ang pagkatapus kuminuran da ka man yang kaliwutan. Baklu ra namagturubuan yang mga luak tung tanek.

**Natetenged Tung Dapat Ang Buaten Nira Tung
Sasang Putul Nirang Natalang (5:19-20)**

¹⁹Mga putulu, kung may asan tung numyung natalang dang nalipat tung kamatuuran, ang pagkatapus may sasang putul nang magpaiwan-iwan tunganya ang para mapabalik na tung kamatuuran, durung pisan agkatinlu yang pagabuatan na. ²⁰Ay yang demdem mi, kung tinu pay magpabalik tung sasang putul nang nagpakasalak ang para indi ra magpadayun tung nagatalangan na, katimbang nang asan da ngaipalibriay na yang aruman na tung kalainan, bilang tung pagpablag na ra rin tung Dios. Maskin durung kasalanan ang nagkarabuatan na, punasen da yang Dios ang luwus.

Ya ra ilem tia ay masulatu tung numyu,

Santiago